



官許

忠經

全

493



官許

後漢南郡太守馬融撰輯
皇朝河合直敬先生訓点

今井章峯閣校正



校正

訓点

大字

忠經

皇京書林

寺町通松原下儿

菊屋喜兵衛發行

忠經序

明治四十二年九月八日奉書亭贈



忠經者蓋出於孝經也仲尼說孝所以事君之
義則知孝者俟忠而成之所以答君親之恩明
臣子之分忠不可廢於國孝不可弛於家孝既
有經忠則猶闕故述仲尼之說作忠經焉
今皇上含庖軒之姿韞勳華之德弼賢俾能無
遠不舉忠之與孝天下攸同臣融巖野之臣性
則愚扑沐浴德澤其可默然作為此經庶少裨
補雖則辭理薄陋不足以稱焉忠之所存存於

勸善勸善之大何以加於忠孝者哉夫定高卑以章目引詩書以明綱吾師於古曷敢徒然其或異同者變易之宜也或對之以象其意或遷之就其類或損之以簡其文或益之以備其事以忠應孝亦著為十有八章所以洪其至公勉其至誠信本為政之大體陳事君之要道始於成功此忠經之義也謹序

後漢南郡太守

馬融 撰

忠經

天地神明章第一

昔在至理上下一德以徵天休忠之道也天之所履地之所載人之所履莫大乎忠忠者中也至公無私天無私四時行地無私萬物生人無私大亨貞忠也者一其心之謂矣為國之本何莫由忠



忠能固君臣安社稷感天地動神明而
况於人乎夫忠興於身著於家成於國
其行一焉是故一於其身忠之始也一
於其家忠之中也一於其國忠之終也
身一則百祿至家一則六親和國一則
萬人理書云惟精惟一允執厥中

聖君章第二

惟君以聖德監於萬方自下至上各有
尊也故王者上事於天下事於地中事
於宗廟以臨於人則人化之天下盡忠
以奉上也 是以兢兢戒慎日增其明祿
賢官能式敷大化惠澤長久黎民咸懷
故得皇猷丕丕行四方揚於後代以保
社稷以光祖考蓋聖君之忠也詩云昭

事上帝聿懷多福

冢臣章第三

為臣事君忠之本也本立而後化成冢
臣於君可謂一體下行而上信故能成
其忠夫忠者豈惟奉君忘身正色直辭
臨難死節已矣在乎沈謀潛運正國安
人任賢以為理端委而自化尊其君有

天地之大日月之明陰陽之和四時之
信聖德洋溢頌聲作焉書云元首明哉
股肱良哉庶事康哉

百工章第四

有國之建百工惟才守位謹常非忠之
道故君子之事上也入則獻其謀出則
行其政居則思其道動則有儀秉職不

回言事無憚苟利社稷則不顧其身上
下有成故昭君德蓋百工之忠也詩云
靖共爾位好是正直

守宰章第五

在官惟明蒞事惟平立身惟清清則無
欲平則不曲明能正俗三者備矣然後
可以理人君子盡其忠能以行其政令

而不理者未之聞也夫人莫不欲安君
子順而安之莫不欲富君子教而富之
篤之以仁義以固其心導之以禮樂以
和其氣宣君德以弘大其化明國法以
至於無刑視君之人如觀乎子則人愛
之如愛其親蓋守宰之忠也詩云豈弟
君子民之父母

北人章第六

天地泰寧君之德也君德昭明則陰陽
風雨以和人賴之而生也是故祇美君
之法度行孝弟於其家服勤稼穡以供
王賦以兆人之忠也書云一人元良萬
邦以貞

政理章第七

夫化之以德理之上也則人日遷善而
不知施之以政理之中也則人不得不
為善懲之以刑理之下也則人畏而不
敢為非也刑則在省而中政則在簡而
能德則在博而久德者為理之本也任
政非德則薄任刑非德則殘故君子務
於德修於政謹於刑固其忠以明其信

行之匪懈何不理之人乎詩云敷政優
優百福是適

武備章第八

王者立武以威四方安萬人淳德布洽
戎夷稟命統軍之帥仁以懷之義以厲
之禮以訓之信以行之賞以勸之刑以
嚴之行此六者謂之有利故得師盡其

心竭其力致其命是以攻之則克守之
則固武備之道也詩云赳赳武夫公侯
于城

觀風章第九

惟臣以天子命出於四方以觀風聽不
可以不聰視不可不明聽則審於事
明則辨於理理辨則忠事審則分君子

去其私正其色不害理以傷物不憚勢
以舉任惟善是與惟惡是除以之而陟
則有成以之而出則無怨夫如是則天
下敬職萬邦以寧詩云載馳載驅周爰
諮諏

保孝行章第十

夫惟孝者必貴於忠忠苟不行所率由

非其道是以忠不及之而失其守匪惟
危身辱及親也故君子行其孝必先以
忠竭其忠則福祿至矣故得盡愛敬之
心以養其親施及於人此之謂保孝行
也詩云孝子不匱永錫爾類

廣爲國章第十一

明王之爲國也任於正去於邪邪則不

忠忠則必正有正然後用其能是故師
 保道德股肱賢良內睦以文外威以武
 被服禮樂隄防政刑故得大化興行蠻
 夷率服人臣和悅邦國平康此君能任
 臣下忠上信之所致也詩云濟濟多士
 文王以寧

廣至理章第十二

古者聖人以天下之耳目為視聽天下
 之心為心端旒而自化居成而不有斯
 可謂致理也已矣王者思於至理其遠
 乎哉無為而天下自清不疑而天下自
 信不私而天下自公賤珍則去貪徹侈
 則人從儉用實則不偽崇讓則不爭故
 得人心和平天下淳質樂其生保其壽

優游聖德以爲自然之至也詩云不識
不知順帝之則

揚聖章第十三

君德聖明忠臣以榮君德不足忠臣以
辱不足則補之聖明則揚之古之道也
是以虞有德咎繇歌之文王之道周公
頌之宣王中興吉甫詠之君子臣於盛
明之時必揚之盛德流滿天下傳於後
世其忠矣夫

辨忠章第十四

大哉忠之爲用也施之於邇則可以保
家邦施之於遠則可以極天地故明主
爲國必先辨忠君子之言忠而不佞小
人之言佞而似忠而非聞之者鮮不惑

矣夫忠而能仁則國德彰忠而能知則
國政舉忠而能勇則國難清故雖有其
能必由忠而成也仁而不忠則私其恩
知而不忠則文其詐勇而不忠則易其
亂是雖有其能以不忠而敗也此三者
不可不辨也書云旌別淑慝其謂是乎

忠諫章第十五

忠臣之事君也莫先於諫下能言之上
能聽之則正道光矣諫於未形者上也
諫於已彰者次也諫於既行者下也違
而不諫則非忠臣夫諫始於順辭中於
抗議終於死節以成君休以寧社稷書
云木從繩則正后從諫則聖

證應章第十六

惟天監人善惡必應善莫大於作忠惡
莫大不忠忠則福祿至焉不忠則刑罰
加焉君子守道所以長守其休小人不
常所以自陷其咎休咎之徵也不亦明
哉書云作善降之百祥作不善降之百

殃

報國章第十七

爲人臣者官於君先後光慶皆君之德
不思報國豈忠也哉君子有無祿而益
君無有祿而已者也報國之道有四一
曰貢賢二曰獻猷三曰立功四曰興利
賢者國之幹猷者國之規功者國之將
利者國之用是皆報國之道惟其能而
行之詩云無言不酬無德不報

盡忠章第十八

天下盡忠淳化行也君子盡忠則盡其力盡力者則止其身盡心者則洪於遠故明王之理也務在任賢賢臣盡忠則君德廣矣政教以之而美禮樂以之而興刑罰以之而清仁惠以之而布四海之內有太平音嘉祥既成告于上下是

故播於雅頌傳於無窮

忠經終

八

官許 天和吉野平恒之屋

明治三年庚午中復發行

發行

大坂 心弁橋北久室寺町 河内屋源七郎

京都 寺町通太原上丸 菊屋七郎兵衛

同 魚店通間之町 丁子屋平兵衛

同 三條通富小路 外屋勘兵衛

同 寺町通松原下ル 菊屋喜兵衛板元

書林

新本 古本

御書物所 諸宗御經類

紙板行本吟味波下並、若とのり

現報古本買請

法不用之古本法拂、前々々々々々々々

寺町通松原下ル

皇都書林

菊屋七郎兵衛



